

古今名醫彙粹卷之八目次

婦人治例集要

女科一

經病通治

立齋四則
注法經一則

東垣

二則

立齋醫案十五則
約之一則

良方藥禁十一條

女科二

赤白帶

子和一則

丹溪一則

立齋一則

醫案四則

水分血分腫

立齋一則

案三條

小便出血熱入血室

立齋一則

案六條

食癥血癥心腹痛症

婦人良方三則

案十三條

師尼寡婦室女寒熱案三條

歷節痛風

立齋一則

案四條

流注

立齋一則

案三條

瘰癧

立齋一則

案五條

女科三

胎前諸症

立齋共四十二則

女科四

產後諸症

立齋共三十則

古今名醫彙粹卷之八

女科一經病通治

薛新甫曰經曰飲食入胃游溢精氣上輸於脾氣散精上歸於肺通調水道下輸膀胱水精四布五經並行東垣先生謂脾為生化之源心統諸經之血誠哉是言也竊謂心脾平和則經候如常苟七情內傷六淫外擾飲食失節起居失宜脾胃虛損心火妄動則月經不調矣有先期而至者蓋血生於脾土故云脾統血凡血當用苦甘之劑以助陽氣而生陰血也蓋先期而至者有因脾經血燥宜加味道遙散有因脾經鬱滯者宜歸脾湯有因肝經怒火者宜加味小柴胡湯有因血分有熱者宜加味四物湯有因勞役火動者宜補中益氣湯過期而至者有因脾經血虛者宜人參養榮湯有因肝經血少者宜六味地黃丸有因氣虛血弱者宜八珍湯

又曰血者水穀之精氣也和調五藏灑陳六府在婦人工為乳汁
下為血海故雖心主血肝藏血亦皆統攝於脾胃補脾和胃血自
生矣凡經行禁用苦寒辛散之藥

經閉

東垣曰經閉不行有三婦女脾胃久虛形骸羸弱氣血俱衰而致
經水斷絕不行或病中消胃熱善食漸瘦津液不生夫經者血脉
精液所化津液既竭為熱所燥肌肉消瘦時見燥渴血海枯竭名
曰血枯經絕宜瀉胃之燥熱補益血氣經自行矣此病適行而有
子亦不成而為胎病者有矣或心胞絡脉洪數躁作時見大便
秘澀小便雖不利而熱水竭絕不行此乃血海乾枯宜調血脉除
包絡中火邪而經自行矣或因勞心火上行月事不來者胞脉
閉也胞脉屬於心而絡於胞中今氣上迫肺心氣不得不通故月
事不來宜安心補血瀉火經自行矣

薛立齋曰經閉夫經水陰血也屬衝任二脉主上為乳汁下為月
水其為患有因脾虛而不能生血者有因脾鬱傷而血耗損者有
因胃火而血銷鑠者有因脾胃損而血少者有因勞傷心而血少
者有因怒傷肝而血少者有因腎水不能生肝而血少者有因肺
氣虛不能行血而閉者治療之法若脾虛而不行者調而補之脾
鬱而不行者解而補之胃火而不行者清而補之脾胃損而不行
者調而補之勞傷心血虛而不行者養而補之怒傷肝而不行者和
而補之肺氣虛而不行補脾胃腎虛而不行補脾肺經云損其肺
益其氣損其心調其榮衛損其脾調其飲食適其寒溫損其肝緩
其中損其腎益其精審而治之庶無誤矣

王宇泰曰薛氏治血枯大法以補養真元為主蓋本易水師弟之
旨而廣之

方約之曰婦人之經病有月候不調者有月候不通者然不調不

通之中有兼疼痛者有兼發熱者此分而為四也不調之中有趨前者有退後者則趨前為熱退後為虛也不通之中有血滯者有血枯者則血滯者宜破血枯宜補也疼痛之中有常時而作痛者有經後經前作痛者則常時與經前作痛為血積經後為血虛也發熱之中有常時發熱者有經行發熱者則常時為血虛有積經行為血虛有熱也則又分而為八焉大抵經病內因憂思忿怒外因飲冷形寒忿怒所觸則鬱而不行經有產後飲冷形寒則惡露不盡此經候不調不通作痛發熱之所由也調氣破血開鬱補虛涼血清熱治之有道也欣然氣行血行氣止血止故治血病以行氣為先香附之類是也熱則流通寒則凝結故治血病以熱藥為佐肉桂之類是也

經水漏

李東垣曰經水漏不住有二婦人脾胃虛損致命門脈沉細而數

疾或沉弦而洪大有力寸關脈亦然皆由脾胃有虧下陷於腎與
相火相合溫熱下迫經漏不止其色紫黑如夏月腐肉之臭中有
白帶者脈必弦細寒作於中有赤帶者其脈洪數病熱明矣必腰
痛或臍下痛溫溫欲行而先發寒熱往來兩脇急縮兼脾胃症出
見或四肢困熱心煩悶不得眠卧心下急宜大補脾胃而升降氣
血可一服而愈或貴而後賤富而後貧病名脫營者心氣不足其
火大熾旺於血脉之中以致脾胃氣失節火乘其中形質肌肉
顏色似不病者此心病也不形于脈故脾胃飲食不調其證顯矣
而經水不時而下或適來適斷暴下不止治當以大補氣血之劑
補養脾胃微加鎮墜心火之藥治其心補陰瀉陽經自止矣痿論
云悲哀太甚則胞絡絕胞絡絕則陽氣內動發則心下崩數溲血
也故經曰大經空虛發則肌痺傳為脈痿此之謂也治宜升陽益
胃湯血脫益氣古人之法也先補胃氣以助生長故曰陽生陰長

諸甘藥為之先務

薛立齋曰血崩經云陰虛陽搏謂之崩又云陽絡傷則血外溢陰絡傷則血內溢又云脾統血肝藏血其為患因脾胃虛損不能攝血歸源或因肝經有火血得熱而下行或因肝經有風血得風而妄行或因怒動肝火血熱而沸騰或因肝經鬱結血傷而不歸經或因悲哀太過胞絡傷而下崩治療之法脾胃虛弱者六君子加芎歸柴胡脾胃虛陷者補中益氣和胃少芍藥山梔肝經血熱四物加柴梔苓朮肝經風熱加味道遙或小柴胡加山梔芍藥丹皮若怒動肝火亦用前藥脾經鬱火歸脾加山梔柴胡丹皮哀傷胞絡四君加升柴山梔或東垣丹溪諸先生云凡下血證須用四君子以收功斯言厥有旨哉若大去血後母以脉胗當急用獨參湯救之其發熱咳嗽脉數乃是元氣虛弱假熱之脉也尤當用人參之類此等証候無不由脾胃先損故脉洪大察其有胃氣受補可

救誤用寒涼之藥復傷脾胃生氣反不能攝血歸元是速其危也
薛立齋醫案一婦人內熱作渴飲食少思腹內近左初如雞卵漸
大四寸許經水三月一至肢體消瘦面頰似瘡脉洪數而虛左關
尤甚此肝脾鬱結之証也阿魏膏午前用補中益氣湯午後以
加味歸脾湯兩月許肝火少退脾胃土少健仍與前湯送六味丸
午後又用逍遙散送歸脾丸又月餘日用蘆薈丸二服空心以逍
遙散下晡時以歸脾湯下喜而調理年餘而愈

一婦人發熱口乾月經不調兩腿無力服祛風滲濕之劑腿痛骨
倦二膝浮腫經事不通余作脾肝腎三經血虛火燥證名鶴膝風
用六味丸兼服兩月形骸漸健飲食漸進膝腫漸消不半載
而痊前症若脾腎虛寒腿足軟痛或足膝枯細用八味丸若飲食
過多腿足或臀後痠痛或浮腫作脹用補中益氣加茯苓半夏
之

一婦人性沉靜勤於女工善怒小腹內結一塊或作痛或痞滿月經不調恪服伐肝之劑內熱寒熱胸膈不利飲食不甘形体日瘦牙齦蝕爛此脾土不能生肺金肺金不能生腎水腎水不能生肝木當滋化源用補中益氣六味地黄至仲春而愈

松江太守何恭人性善怒腹聚一塊年餘形骸骨立倏熱往來瞞蝕透腮或泥春木旺尅土仍行伐肝時季冬脉洪數按之弦緊餘脉微弱余曰洪數弦緊肝經六氣盛見口邪氣寔也自保不及何能尅土况面色青中隱白乃腎水不足肝木虧損肺金尅制惟慮至春木不能發生耳勉用壯脾腎滋腎水二劑肝脉悉退後大怒耳內出血肝脉仍大按之如無煩燥作渴此無根之火以前藥加肉桂二劑肝脉仍斂熱渴頓退復因大怒以致飲食不進果卒於季冬辛巳日此木衰弱而金刑尅信矣

一婦人經候過期發熱倦怠或用四物黃連之類反兩月一度且

血少而成塊又用峻藥通之兩目如帛所蔽余曰脾為諸陰之首
目為血脉之宗此脾傷五藏皆為失所不能歸於目矣遂用補中
益氣濟生歸脾二湯專主脾胃年餘愈

一婦人年四十歲性急口飲食難化月經不調服理氣化痰藥
反肚腹膨脹大便泄瀉又加烏藥蓬朮肚腹腫脹小便不利加猪
苓澤瀉痰喘氣急手足厥冷頭面肢體腫脹指按成窟脉沉細右
寸為甚余曰此脾肺之氣虛寒不能運化水道下輸膀胱滲泄之
令不行生化之氣不運即東垣所云水飲留積若土之在雨中則
為泥矣得和風暖日水濕去而陽化自然萬物生長喜其脉相應
遂與金匱加減腎氣丸料服之小便即通數劑腫脹消半四肢漸
溫自能轉側又與六君子加木香肉桂炮薑治之全愈後不戒七
情飲食即為泄瀉仍用前藥加附子五分而安

一婦人素有頭暈不時而作月經遲而少余以為中氣虛不能上

升而頭暈不能下化而經少用補中益氣湯而愈後因勞而仆月經如湧此勞傷火動用前湯加五味子一劑服之即愈前症雖云亡血過多氣無所附實因脾氣虧損

西賓錢思曾子室年三十尚無嗣月經淋漓無期夫婦異處者幾年矣思曾欲為娶妾以謀諸余曰此鬱怒傷肝脾虛火動而血不歸經乃肝不能藏脾不能攝也當清肝火補脾氣遂與加味歸脾逍遙二藥送至其家仍告其姑曰此病自愈而當受胎妾可無娶也果病愈次年生子

一婦人多怒經行或數日或半月後止三年後淋漓無期肌骸瘦口乾內熱盜汗如洗日晡熱甚余用參朮芩歸朮神遠志杏仁麥冬五味丹皮龍眼肉炙甘草胡升麻治之獲痊此症先有怒動肝火血熱妄行後乃脾氣下陷不能攝血歸源故用前藥若胃熱亡津液而經不行宜清胃若心火亢甚者宜清心若服燥藥過多

者宜養血若病久氣血衰宜健脾胃

一婦人性善怒產後唇腫內熱月水不調食少作嘔大便不實唇出血水用理氣消蘊胸膈痞滿頭目不清唇腫經閉用清胃行血肢體倦怠發熱煩躁吐衄出血欲用通經之劑余曰病本七情肝脾虛損數行攻伐元氣益虛故耳法當補陰益陽加以加味歸脾湯加味逍遙散補中益氣湯如法調治元氣漸復唇瘡亦愈後因怒寒熱耳痛胸脇脹悶唇瘡甚此是怒動肝火而血傷遂用四物合小柴胡加山梔頓愈後又怒脇乳作脹肚腹作痛嘔吐酸涎飲食不入小水不利此是怒動肝木尅脾土乃用補脾氣養脾血而愈又因勞役怒氣飲食失節發熱喘渴倦怠不食去血如崩唇腫熾甚肝經有火脾經氣虛遂用補中益氣加炒山梔丹皮芍藥而愈此症每見但治其瘡不固其本而死者多矣

一婦人年六十有四久鬱怒頭痛寒熱春間乳內時痛服流氣飲

之類益甚不時有血如經行又人驚恐飲食不進夜寐不寧乳腫
及兩脇焮痛如炙午後色赤余以為肝脾鬱火血燥先以逍遙散
加酒炒黑龍胆一錢山梔半錢二劑頓退又二劑而全消再用歸
脾加炒梔貝母諸症悉退

一婦人因怒血崩久不已面青黃而或赤此肝木剝脾土而血虛
也用小柴胡合四物以清肝火生肝血又用歸脾補中二湯益脾
氣以生肝血而瘥若因肝經有風熱而血不寧者用防風一味為
丸以兼證之藥煎送或肝經火動而不寧者用條芩炒為丸以兼
證之藥煎送無有不効

一婦人性急每怒非太陽手項喉齒胸乳作痛則胸滿吞酸吐瀉
少食經行不止此皆肝火之症肝自病則外症見土受剋則內症
作若自病見用四物加白朮茯苓炒山梔炒龍胆若內症作用四
君加柴胡芍藥神曲吳萸炒連諸症漸愈惟月經不止是血分有

熱脾氣尚虛以逍遙散倍用白朮茯苓陳皮又以補中益氣加酒炒芍藥煎服而調

歸大化內人患月事不期崩血昏憤發熱不寐或謂血熱妄行投以寒劑益甚或以膠艾湯投以止血亦不效余曰此脾氣虛弱無以統攝故耳法當補脾而血自止用補中益氣湯加炮薑不數劑而痊驗惟終夜少睡驚悸其家另服八珍湯更不效余曰雜矣乃與歸脾湯加炮薑以補心腎遂如初

一婦人素有胃火服清胃散而安後因勞役燥渴內熱肌肉消瘦月經不行此胃火消燦陰血用逍遙散加丹皮炒山梔以清胃熱用八珍湯加茯苓遠志以養脾血而經自行

一婦因勞耳鳴頭痛骭倦此元氣不足用補中益氣加麥冬五味而痊三年後得因飲食勞倦前症益甚月經不行晡熱內熱自汗盜汗用六味地黃丸補中益氣湯頓愈前症若因血虛有火用四

物如山梔柴胡不應八珍加前藥若氣虛弱用四君子若怒耳便
聾或鳴者寔也小柴胡加芎歸山梔虛用補中益氣加山梔若干
前甚作火治用小柴胡加炒連炒梔氣虛用補中益氣午後作血
虛用四物加白朮茯苓若陰虛火動或兼痰甚作渴必用地黃丸
以壯水之主經云頭痛耳鳴九竅不利腸胃之所生也脾胃一虛
耳目九竅皆為之病

治法綱曰內經有血枯一症與血隔相似皆經閉不通之候然而
枯與隔則相反有如冰炭夫枯者枯竭之謂隔者阻隔之謂血本
不虛而或氣或寒或積有所逆病發於暫其証則或痛或寔必通
之以血行而愈此可以考者其來有漸脾胃氣乏衝任內竭其
症無形此必不可通者也夫血既枯矣只當補養陰氣使其血充
若勉強通之則枯愈枯不危何待耶

一通經丸若脾胃無虧暴怒氣逆或生冷所傷陰血凝滯月經不通者宜暫用之若脾胃虛弱不能生血者宜用六君當歸若因脾胃鬱火內耗其血者宜用歸脾湯若因肝脾鬱怒而月經不通者宜用加味歸脾湯若因肝火虛熱血傷而月經不通者宜用加味逍遙散

一艾附丸若脾胃虛寒陰血不足氣逆發熱月經不調或胎氣不成者暫宜用之若肝腎虧損內虛發熱月經不調或崩漏帶下或便血吐血或小便淋瀝或晡熱內熱寒熱往來或盜汗自汗不時發熱宜用六味丸若兼脾氣不足飲食少思者佐以六君子

一四物湯若脾經血燥發熱或月經不調宜暫用之若因脾經虛熱肝經怒火所致宜用四君子佐以加味逍遙散若因脾經氣虛血弱兼晡熱內熱宜用八珍湯加柴胡丹皮若因元氣下陷而致諸症宜用補中益氣湯